

Na Aruba tin varios mucha cu dislexia

Fundacion Pro Persona cu Dislexia

lo aporta guia con pa trata un estudiante cu dislexia



ORANJESTAD (AAN): Actualmente Aruba tin un fundacion cu yama Fundacion Pro Persona cu Dislexia. Ramon Todd Dandaré ta presidente di e fundacion y el a duna di conoce cu e cantidad di muchanan cu dislexia ta creciendo na Aruba.

Un mucha cu dislexia ta un persona cu no ta lesa bon y na skirbimento tambe por ripara esaki. Sinembargo un mucha cu ta dislexico por siña biba cu e situacion aki. Tin hopi hende na mundo cu ta sufri di dislexia.


Un persona cu ta dislexico no ta mira e leternan manera cu nan ta y ta bruha nan den otro. Hopi biaha nan ta wak un "P" pa un "B" un "A" na luga di un "E". Tambe nan ta wak e cifranan pa otro cifra.

E muchanan aki ta siña lesa cu hopi dificultad.

Todd Dandaré a mira e necesidad di por lanta un fundacion cu personanan cu e problema di dislexia debi cu na Aruba tin hopi mucha cu ta sufriendo di dislexia na diferente scol.

Hopi biaha e mayornan na cas no sa di e situacion aki y tampoco e maestronan no sa tampoco con pa detecta un mucha cu dislexia debi cu nan no a haya preparacion pa detecta e problema aki.

E fundacion lo bay yuda pa concientiza y duna tips na docentenan pa nan por detec-



ta muchanan cu dislexia aki na Aruba.

Segun e experto, e fundacion tabata tin su prome encuentro y na unda cu tin mas cu 50 mayor cu a asisti cu sa cu nan yiu tin e problema di dislexia. Ta importante pa bo yiu por haci e test di dislexia pa asina tanto e mayor y e docente ta na altura di e capacidad di e mucha y con mester sigui cune den klas y tambe si e ta bay tin mester di ayudo extra pa e por siña lesa mas miho pa asina e paga mas tino unda cu e por haci fout y e mes por trata di ripara esaki.

Fundacion Pro Persona cu Dislexia tey pa yuda e mucha, mayor y tambe docente pa tin un miho bista y trata na muchanan cu dislexia aki na Aruba. Tambe lo registra cada mucha cu tin dislexia pa asina evalua e necesidad pa yuda e grupo aki.